



Հաստատում եմ  
Հայաստանի պատմության թանգարանի  
տնօրեն

Գ.Վ. Գրիգորյան

05.03.2020 թ.

**Կ Ա Ր Ծ Ի Ք**

**Արմինե Արարատի Գաբրիելյանի**

«Արցախի Տիգրանակերտի անտիկ խեցեղենը (տեխնիկատեխնոլոգիական  
բնութագիրը, գործառնության-ձևաբանական դասակարգումը, գեղարվեստական  
հարդարանքը)»

վերնագրով թեկնածուականատենախոսության մասին

Հայաստանի պատմության թանգարանի հնագիտության և դրամագիտության  
բաժինների 2020 թ. մարտի 3-ի ընդլայնված նիստում քննարկվեց ՀՀ ԳԱԱ  
Հնագիտության և ազգագրության ինստիտուտի հայցորդ Արմինե Արարատի  
Գաբրիելյանի «Արցախի Տիգրանակերտի անտիկ խեցեղենը (տեխնիկատեխնոլոգի-  
ական բնութագիրը, գործառնության-ձևաբանական դասակարգումը, գեղարվեստա-  
կան հարդարանքը)» վերնագրով ատենախոսական աշխատանքը՝ պատմական գի-  
տությունների թեկնածուի գիտական աստիճանի հայցմամբ:

Նիստին մասնակցում էին թանգարանի փոխտնօրեն Ի. Մկրտչյանը, հնագի-  
տության բաժնի վարիչ Լ. Խաչատրյանը, հնագիտության բաժնի գիտաշխատող,  
պ.գ.թ. Ա. Զոհրաբյանը, ֆոնդապահներ Լ. Մխիթարյանը, Ս. Հովսեփյանը, Զ.  
Կարապետյանը, դրամագիտության բաժնի վարիչ պ.գ.թ. Ռ. Վարդանյանը,  
գիտաշխատող Հ. Հովհաննիսյանը:

Ելույթ ունեցան Ի. Մկրտչյանը, Լ. Խաչատրյանը, Ա. Զոհրաբյանը, Ռ.  
Վարդանյանը: Նիստի մասնակիցներն արձանագրում են հետևյալը.

Ատենախոսությունը նվիրված է Արցախի Տիգրանակերտի ուշ հելլենիստական  
և ուշ անտիկ շրջանի (մ.թ.ա. I – մ.թ. III դդ.) խեցեգործական մշակույթի ուսումնասի-  
րությանը: Աշխատանքն իրականացվել է 2006-2017 թթ. քաղաքի հնագիտական

պեղումների ընթացքում հայտնաբերված շուրջ 40 հազար միավոր կազմող խեցեգործական նյութի ուսումնասիրությամբ:

Ատենախոսությունը բաղկացած է ներածությունից, համապատասխանաբար՝ վեց, չորս և հինգ ենթագլուխներ պարունակող երեք գլուխներից, և եզրակացություններից: Այն ունի հապավումների, սկզբնաղբյուրների և գրականության, քարտեզների և աղյուսակների ցանկեր, 4 քարտեզ և 64 աղյուսակ:

Արցախի Տիգրանակերտում, տարիների ընթացքում հետևողականորեն և արդյունավետ կերպով իրականացվող հնագիտական պեղումներից հայտնաբերված, մի որոշակի ժամանակաշրջանի վերաբերող խեցեղենի ամբողջական, բազմակողմանի և խորացված ուսումնասիրություն կատարելու գաղափարն արդեն իսկ ողջունելի է: Առավել ուրախալի է այն, որ աշխատանքը կատարվել է բանիմացությամբ և գիտական բարեխղճությամբ:

Ներածության մեջ ատենախոսը հիմնավորում է թեմայի արդիականությունը, ձևակերպում է աշխատանքի նպատակն ու խնդիրները, գիտական նորույթը, ներկայացնում հետազոտության մեթոդաբանությունը, աղբյուրների և գրականության համառոտ տեսությունը:

Առաջին գլխում, որը նվիրված է Տիգրանակերտի անտիկ խեցեղենի պատրաստման տեխնոլոգիային և տեխնիկական հնարներին, մանրամասն նկարագրված է հումքի ընտրությունը և նախապատրաստումը, խեցանոթների պատրաստման, չորացման, մակերեսի մշակման և թրծման գործընթացները: Խեցու գույնի, կտրվածքի և մակերեսի մշակման հատկանիշներով, հեղինակն առանձնացրել է երեք տեխնիկական խումբ, տալով դրանցից յուրաքանչյուրի մանրամասն բնութագիրը և հայտնաբերված խեցեղենի ընդհանուր զանգվածում դրանց տոկոսային հարաբերակցությունը:

Երկրորդ, ամենաընդարձակ գլուխը, նվիրված է անտիկ խեցեղենի ժամանակագրական և գործառական-տիպաբանական դասակարգմանը: Հեղինակը նշում է, որ ուսումնասիրվող նյութի ժամանակագրական տարանջատման համար կողմնորոշիչ նշանակություն են ունեցել քաղաքի Անտիկ թաղամասում արձանագրված երեք մշակութային շերտերի տվյալները, որոնցից ստորին երկուսը վերաբերում են ուշ հելլենիստական (մ.թ.ա. I – մ.թ. I դդ.) և ուշ անտիկ (մ.թ. II-III դդ.) ժամանակա-

շրջաններին: Ձևակազմական և հարդարման հատկանիշներով՝ այս երկու շերտերում հայտնաբերված խեցեղենի առանձնացումն իրարից դժվարություն է ներկայացնում: Այս հանգամանքը հեղինակը հնարավոր է համարում բացատրել անտիկ ժամանակաշրջանում բնակչության կազմի փոփոխության բացակայությամբ: Այդուհանդերձ, հետազոտողը նկատել է, որ վաղ շրջանի խեցեղենի զանգվածում ավելի առատ են գունազարդ անոթները, իսկ ուշ շրջանի նյութերում՝ դեղնականաչավուն երանգներով անոթները:

Նախքան խեցեղենի գործառության և ձևաբանական դասակարգումը ներկայացնելը, հեղինակը կատարել է տիպաբանական դասակարգման տեսական և մեթոդաբանական խնդիրների վերլուծություն և հիմնավորել դասակարգման համար իր կողմից ընդունված սկզբունքները, որոնց հիմքում ընկած է Գ. Նարինանիշվլիի մշակած սխեման: Կիրառական հատկանիշներից ելնելով, նյութը բաժանվել է կատեգորիաների, որոնք, ըստ ձևաբանական հատկանիշների, ստորաբաժանվել են տեսակների, տիպերի և տարբերակների: Ուսումնասիրված խեցեղենը աշխատանքում ներկայացվել է այդ սխեմայով. յոթ կատեգորիաներ, որոնք ներառում են խեցեղեն իրերի երեսուներկու տեսակներ, որոնցից ոմանք ներկայանում են մի քանի տիպերով (քսանմեկ տիպ), որոնց մեջ հանդիպում են նաև տարբերակներ (վեց տարբերակ):

Այս գլխում առանձին քննարկվել են նաև դեռևս փոքրաթիվ, բայց Տիգրանակերտի տնտեսական ու մշակութային կապերի բացահայտման համար կարևոր՝ ներմուծված խեցեղենի նմուշները:

Նշելով, որ տիգրանակերտյան նյութերում վառ են արտահայտված հելլենիստական Արևելքի խեցեգործությանը բնորոշ ընդհանուր միտումները, ատենախոսին հաջողվել է, այնուամենայնիվ, հայտնաբերել սափորների, կաթսայատիպ անոթների, թասերի և գավաթների մի քանի տիպեր, որոնք այլ վայրերում չեն հանդիպում:

Երրորդ գլխում հեղինակը ներկայացրել է խեցեղենի գեղարվեստական հարդարանքի իրականացման եղանակները՝ գունազարդում, փորագրագարդում, դրոշմագարդում, ծեփում և վերադրում, փայլեցում: Ըստ գունազարդ անոթների վրա հանդիպող զարդամոտիվների բնույթի՝ դրանք խմբավորվել են որպես երկրաչափական, բուսական, ֆիգուրատիվ և այլ: Այդ խմբերում առանձնացվել են ենթախմբեր՝ ըստ պատկերների տեսակների և դրանց դասավորվածության: Զարդապատկերների

յուրաքանչյուր տեսակը համարակալվել և նկարագրվել է խումբ/ենթախումբ դասակարգմամբ, նշվել է, թե այն հատկապես ինչպիսի անոթների վրա է հանդիպում, հիշատակվել են այլ վայրերից հայտնի գուգահեռները, այն պատկերվել է գրաֆիկական և լուսանկարչական աղյուսակներում:

Ատենախոսությունն ավարտվում է ամփոփիչ եզրակացությամբ, որում, մասնավորապես, նշվում է, որ Արցախի Տիգրանակերտի անտիկ խեցեղենը Հայաստանի ուշ հելլենիստական ժամանակաշրջանի խեցեղենի օրգանական մասն է կազմում: Միննույն ժամանակ, Տիգրանակերտի, իսկ ավելի լայն առումով՝ Արցախի և Ուտիքի խեցեղենն ունի որոշակի տեղային առանձնահատկություններ, որոնք դրսևորվում են ինչպես որոշ անոթների ձևերում, այնպես էլ զարդապատկերման մեջ:

Արմինե Գաբրիելյանի ատենախոսությունն իր կուռ կառուցվածքով, հարուստ բովանդակությամբ, առանց ավելորդաբանությունների՝ գրագետ շարադրանքով, հասուն գիտական աշխատություն է: Արցախի Տիգրանակերտում մինչ այսօր պեղումներով հայտնաբերված անտիկ խեցեղենի համակողմանի ուսումնասիրման այս օրինակը կարևոր ներդրում է Հայաստանի անտիկ խեցեղենի ուսումնասիրման, մասնավորապես՝ դասակարգման, բնագավառում:

Ըստ արժանավոյն գնահատելով ատենախոսի կատարած ծավալուն և արդյունավետ աշխատանքը՝ կցանկանայինք նրա ուշադրությունը հրավիրել մի քանի վրիպումների վրա:

1. Աղյուսակների ցանկում, խեցեղեն իրերի ձևակազմական գործընթացի վերաբերյալ 12.1-3 նկարների հեղինակի կամ աշխատության մասին հղումի անհրաժեշտություն կա:

2. Էջ 14-ում հեղինակը նշում է, որ «խեցու վերջնական գույնը պայմանավորված չէր կավի նախնական գույնով», սակայն անոթների խեցու նկարագրություններից մի քանիսում հանդիպում ենք «պատրաստված է բաց օքրայագույն կավից», «պատրաստված է բաց կարմրավարդագույն կավից» (էջ 55), «պատրաստված են կաղապարով, օխրայագույն և մոխրագույն կավից» (էջ 74), կամ «գորշավուն խեցուց պատրաստված» արտահայտությունների: Եթե դիտարկումները կատարվել են վիզուալ եղանակով, ինչպես նշում է հեղինակը, ապա ինչպե՞ս է որոշվել հումքի նախնական գույնը:

3. Էջ 96-97-ում ասվում է, որ բեկորը «կարող էր պատկանել միականթ փառ-  
ջանման անոթի», բայց աղ. 63, նկ. 1-ում անոթի վերակազմությունը պատկերված է  
երկու կանթով:

Նշված և մի քանի այլ փոքրիկ թերություններն ամեննին չեն նսեմացնում ատե-  
նախոսական աշխատանքի գիտական արժեքը:

Ատենախոսության սեղմագիրն արտահայտում է աշխատանքի հիմնական բո-  
վանդակությունը, որում տեղ գտած դրույթներն ու թեզերը հրատարակվել են վեց  
աշխատություններում:

Հայաստանի պատմության թանգարանի հնագիտության բաժինը գտնում է, որ  
Արմինե Արարատի Գաբրիելյանի «Արցախի Տիգրանակերտի անտիկ խեցեղենը  
(տեխնիկատեխնոլոգիական բնութագիրը, գործառության-ձևաբանական դասա-  
կարգումը, գեղարվեստական հարդարանքը)» վերնագրով ատենախոսական աշխա-  
տանքը լիովին բավարարում է թեկնածուական ատենախոսություններին ներկայաց-  
վող պահանջներին և հեղինակն արժանի է իր հայցած գիտական աստիճանին: Այս  
աշխատությունը ցանկալի է տեսնել հրատարակված:

Հնագիտության բաժնի վարիչ՝



Լ. Ե. Խաչատրյան

Լ. Ե. Խաչատրյանի ստորագրությունը հաստատում եմ

Հայաստանի պատմության թանգարանի

փոխանորեն՝



Բ. Ս. Մկրտչյան

05.03.2020 թ.